



La sabide e jere la dì dai motorins.

No jerin compits o fantacinis che ju tignissin: a vevin di lâ a cori su lis Rivis.

Bicio, inforcjât il so gjespon ros, cul plen di misele, al cjapave sù i amîs e vie, a zighetâ sul Cjastelîr, simiotant il motocross. A corevin come mats su e jù pal rivâl, tabiant la menighe, e fasint gincanis jenfri agacis e rôî. Chei motôrs a vevin plui trucs di un mago, e a rontavin piês che une metraie, sfolmenant i mierlis e lassantsi daûr la puce di cuet.

Nerio al jere inmò masse piçul, par scuvierzi i boscs che a cerclavin il Cjastelîr.

Al scugnive spietâ che so pari lu puartàs a cjace, o a pescjâ te Lavie, a mancul di no stâ cun so nono, a imparâ a uçâ la manarie. Ma Nerio al jere un pevarin e al veve scuviert un troi, platât tai fossâi, che lu menave dret sot la colinute sfodrade di agacis e saût. Si distirave li, intun pont precîs te jerbe dal rivâl, e al poiave la orele par tiere, in spiete dal rontâ di chês bestiis ruzantis e di chei zovins che a scherçavin intune lenghe cuasi foreste. A passavin propite parsore di lui, ma nol veve il coragjo di meti fûr il cjâf. Il davoi, un *ta-ta-ta-ta* che al centenave tes oreli, lu spaurive e blocave. Ma prin o dopo... si diseve, al sarès saltât fûr a

viodi!

E a fo une dì che Bicio al veve metût sù une gnove marmite, che Nerio al decidè di metisi tal mieç dal troi des Rivis. I mancjà un moment che a nol saltàs fûr un patatrac!

Il gjespon i rimetè un spielut, Bicio un sbrego tai blue jeans e Nerio une scussade sui zenoi. La pôre però, ju cjapà ducj i doi pal cuel, sblancjantju tant che un bleon.

«Al jere un cjavâl di fier ros, slusint, che al molave un berli teribil, voidât di un cjavâlîr cul cjâf grandonon, taront, e cence muse!» al contave Nerio, a so pari.

«Voaltris mi cjolarîs pal cûl, ma soi colât parcè che mi à straviersât la strade un frut vignût fûr dal nuie! E al jere vistût dut di piels!» al contave Bicio ai siei amîs.

*«Al someave un che al saltàs fûr di un altri timp!» A diserin ducj i doi a un ciert moment, savint za che nissun ju varès crodûts.*

**di Rafaêl Serafin**